

太

函

集

太函集卷之四十三

新都汪道昆伯玉著

行狀八首

明故通議大夫南京戶部右侍郎程公行狀

萬曆紀元戊子冬十月丁亥通議大夫南京戶部右侍郎程公以天年終余聞訃從尚書殷公匍匐臨之歛矣既傷既吊退就西階尚書語余吾二人猶鼎足也公已矣自盡在諸孤入告在所部寃宥之事在國老卹典在縣官乃若實錄其平生吾耄矣是在司馬道昆唯唯不佞其何敢辭余先大父故從公之先

大父以鹽筴賈浙江相與莫逆余先考若公之先考並受賈相與通家歲乙酉冬十一月戊辰公始降余後公一月而生皆伯子也癸卯公先余賓興丁未對公車則同籍筮仕同爲浙令既分部南北同爲司馬尚書郎艾則賜告而歸同家食今茲之狀余爲役其何敢辭嘉靖初程大父私語余大父歸爲先世營葬中堪輿幸而舉孫將大吾戶公生之夕里隣夢鶴降而翔公庭大父聞公生色帖帖喜此聞孫也吾門其中興乎公名嗣功字汝懋里人唐處士挾唐舉術目公塾中則就公考氏言郎君相種吾兩兒始舞勺遺

之成均願郎君與俱友天下士公以總角傾章甫遂
成名始令武康巖邑也公年少覲若處子人人以冠
玉美之境內有殺人而沉之河其家跡之莫能得公
發紆狀人人以爲神比及三年僅論徒一牘耳諸父
老勒碑以繫遺愛迄今首循良守南職方歷三年考
封父母如令甲比遷秩流倭薄都城大司馬四明張
公曰君行吾誰與守于時公居中調度譚襄敏出師
禦之倭卻而東兩君子力也遷四川按察司僉事治
兵安綿龍川土酋隸部中正副故相構會權金爭利
逋稱兵公單車入采阻以大義責之其副隨公車來

歸奉京正循跋扈公擒首事十餘冒法之二姓革
心其獨立解進湖廣布政司叅議取道歸寧公母伏
枕而望公來侍養旬日而訣喪畢起補浙江故陸太
保以司隸幸世宗乃暴死其徒屬橫如故侵公部
民田公撻蠶尾而翦之反其業陸所善諸勳貴其在
其黨膚慙而激之則以詔賜司隸田坐違詔旨
徐文貞當國習知公宣言於朝程君故以持重特著
聞趙中丞數羣不逞狀愼毋蔽日月而干雷霆諸勳
貴喑無言事遂寢進河南按察司協堂副使同年夫
已氏以督學爲僚冀中丞手翼翼足蹒蹒浮慕先哲

夫已氏亦騰口說象恭如中丞例監司缺則協堂攝之中丞由部寺起家不習成事攝不之協堂而之督學公稱疾舍中丞丞噉之量移䟽入歸三月而奉封公諱乃終喪起補貴州土酋安國亨內相軋王開府主征討屬公爲監公建議曰安氏故主羈縻小有言則示之罰耳且彼內釁何至興王師彼恃險而多樹兵寧卒能制其死命諸郵費彼之自出或不給如國體何直指蔡使君獨當公未發也開府卒自用師出無功反郵人不共公從使君行部至聲義勅法令得自新酋共命如初境內底定進江西布政司叅政分

守贛州編戶故與盜通舍鑊鋤即鈐棘征未及禡率
自內漏師機事不密則害成此明忌也中丞李公至
公密告之因潛師襲其巢俘馘渠魁以徇進河南按
察使尋遷廣東右布政使理軍興時殷尚書自督府
定章程分布水陸兵至宿飽率仰給關中既捷論功
同被賞格及進廣西左轄惟衡石出入爲斤斤宗藩
缺祿有年往往羣譟執券求補公既給歲祿以其羨
者當左券而倍銷之宗人驪然刀布雖詘可以療饑
刀筆雖贏猶盡餅耳遷應天府府尹蓋奉明詔汰
老疾而簡精彊至則省費輕繇務與圻內休息當入

計權府庫而攝之丞吏倉皇白失金公色自若已而得金以告公色自若吏退而吐舌曰公度如裴晉國吾儕幸有生亡何丞以鍰金充資斧公避席曰安取此對曰羨也例有之公謝生平不侵一赫蹏無論羨矣則又曰資斧不具行將安之公笑曰吾上計者三悉取諸歲祿之仂不足則持之以儉交際取成禮耳多亦奚爲治獄務當人心無事苛細時有逢掖父子迎婦而貧徧告庶司誣以不女庶司不能難公聽之召博士立之庭正色厲聲而訊是皆博士弟子寧以論財之故加處子以不令之名爾則非夫吾不忍布

之爰書以鱣名教則皆慙服以好合終焉進南京戶部右侍郎以督軍儲兼憲職公洞哲利弊上五便事絜爲令行之三載質成贈大父永安父俛俱通議大夫南京戶部右侍郎大母鄭母方俱淑人內子汪封淑人廕一子入監亦越二載上䟽乞骸骨歸及上總攬萬幾詔錄諸耆舊都給事中周邦傑御史韓國禎等並列公名推轂之監大夫部使者遞舉境內人材造羽相及公不更駕顛毛未艾而待終日居南樓期諸斑白者角奕小飲暇則課諸子經藝歲大比則羣舉宗子弟而面試之自公起家繼公後而舉南

宮者二人舉澤宮者九人公其嚆矢者也公元子道
充三子道章五子道康並以明經起次子道立以例
四子道新以任並入辟雍七子道彥補郡諸生獨六
子道育後公而折要之七穆競爽壹稟于鴈鳩郡中
無兩閭內莊淑人甚其生也歲月日時皆同人言嘉
耦何負周南無庸樛木矣公先世自太守公肇晉忠
壯公徇梁文清公相宋槐塘迄今稱相府王宗盟其
始遷自河西故有會通譜久之焚矣公主宗祏續會
通而譜本支公以伯子承家門內之事季爲政歷仕
三十年所視故業無所加惟季手割之不問肥瘠居

常以身下仲季白首無間言歲時之會必俱驩乃洽
否則投箸而起不盡驩封公季年舉孽子亦既授之
貲產牘有遺言公從而附益之以溢著愛近屬告乏
饑授糗寒授衣昏授禽葬授賻遇長老則恂恂退讓
即三尺童子必攝衣冠而禮之里有違言得公一言
而解族與隣閔于刑書公居其間卒迨大辟是歲公
寢疾里人禱之社宗人禱之祠各輸未盡之年悉歸
公以埤難老頃之良已舉言宗廟社稷有靈及五子
道康從子道庠並舉于鄉公意自得獨念考妣未及
封樹舉而合葬先世侍郎公墓之陽越十日竣工公

革矣諸孤蒲伏床下請遺言公正襟而訣諸孤而曹
第師儉第敦和吾瞑矣先期之昔有大星隕舍旁其
光燭天人以爲異徵也其從箕尾隕哉公居官名公
卿多公者其言曰夫人不爲厚利則爲名高公陽不
求可喜之名陰脩可誦之義無智名無勇功無信節
無情行躬行君子其公也哉公居鄉諸父老多公者
其言曰夫人歸老于家不取贏則任放取贏者鄙任
放者自輕公心不計錙銖口不問田舍耳目不近聲
色服御不習輕肥概諸中庸則其人近之矣不佞之
言曰取數多者人也有畸人有全人有大人特立獨

行之謂畸亾論已名實純粹之謂全充實光輝之謂大之人也喜怒不形於色寵辱不入于心庶幾乎大
人之度削雕爲朴侗然其赤子乎乃若廓然而無町畦豁然而無邊幅恬然而無畔援于于然而無將迎
是謂全德夔夔然其孝也怡怡然其友也雍雍然其鼓瑟琴也濟濟然由由然其集麟趾也是謂全昌斯
其百嘉之宗百順之聚也其曰全人信乎其什全矣
于時里胥黨正博士諸生上其狀所部所部以聞太
宰議贈大宗伯議祭大司空議塋請命而下有司
諸孤日幾幾望之以襄大事則以墓門之石謁政府

神道之碑謁王長公不佞草狀既成就尚書質當否
尚書長太息曰實錄也辭無溢美公足以當之諸孤
稽顙羅拜相者致辭幸哉先府君可作矣系曰公婚
媾皆間右名家鮑著櫟樾黃著竦塘吳著谿南汪著
潛口著叢睦殷著上里方著巖鎮洪著洪源息女一
室方司徒長子以蒙子婦七人長爲棠樾尚書孫次
竦塘鴻臚女三四皆自溪南出並繼以黃五納竦塘
六納溪南七納洪源道充三子家夔室竦塘中書女
家啟字潛口鴻臚女家望字巖鎮道立一子家卿道
章四子家禎室叢睦家祚字殷尚書孫家禧字溪南

幼家祿道新四子家傳字巖鎮家仲字溪南次家價
家伋道康二子家佐字溪南次家柱道育一子家兆
道彥二子家翰字溪南幼家軾通計孫十有七人曾
孫一人孫女十有四人曾孫女二人鼎盛矣門內食
指以百計得不一書

潛川汪太孺人唐氏行狀

潛川余近屬也里閭相望雞犬相聞余侍忠愍公同
朝余叔父也余以猶子得謁淑人母水部舍中忠愍
公母弟上林公余叔父也余家食久矣顧未及庭謁
太孺人然女史稱載吾宗則太孺人賢母也歲丙戌

冬十二月下旬之三日太孺人以末疾暴終於時伯
子居靜守鴻臚仲子居貞將與計偕未及發則與季
子居常即次而以狀屬道昆將藉于連太史公斬不
朽于墓門之石道昆職在宗祔狀惡乎辭唐氏系出
槐塘故多顯者正德中御史相以直言忤中貴棄繻
而歸是爲太孺人曾大父大父誥守深州多惠政父
世勳有長者行誦義于鄉處士昏曹則龍泉令錡女
正德丙子冬十月下旬之一日太孺人生比顰絲業
已婉婉服姆教父爲之擇壻得上林公歸事舅都水
公姑太宜人方稱能婦舅沒姑老仲姒從忠愍公宦

四方姑遘疾者三疾幾殆太孺人躬奉湯藥侍臥起旦夕祈以身代姑疾遞平姑九十乃終老上林公代伯仲當室息故資五倍有加南賈淮海北賈幽燕業隆隆起太孺人佐之以儉自奉穀于中人上林公孳孳治生日不暇給事無鉅細必身親之太孺人佐之以勤自雞鳴以迄夜分不遑寢食上林公休休有容遇䟽戚無所失太孺人佐之以禮即隣里鄉黨無間言上林公然諾必矜務振人之急太孺人佐之以義日陳說馮文簡范文正之徵應歆動之初太孺人待年于家家故鼎盛既遭不造歲時餽問不衰母黨德

太孺人即生男無若生女良矣伯姒遺孤女嬪于黃
太孺人閔焉恤其廢不啻其所自出初不宜子勝胡
姬進上林公既而躬舉丈夫子三姬蚤世太孺人哀
之甚營葬夷于斧封姬有弟失賈而貧居靜以告且
曰故姬弟在願得比屋上烏太孺人領之命篋庫波
及其第三子既在外傳皆受經仲補諸生伯季籍胄
子太孺人程督廩廩日討而訓之自而母有家所不
足者非刀布也而仲伯殉國爾曹屈首未伸而母所
望于爾曹在此不在彼勉矣而母寧詎非鄴人母邪
太孺人居庭三子夔夔奉教而母索居柵內不入外

言姆稱吾鄉名公卿若而人賢大夫若而人良士若而人某也才某也博學某也躬行君子而母津津乎樂聞之也願爾曹效之所不其然即赫赫殆將揜耳壬午居貞舉京師賢書至舉室欣欣有喜色太孺人叱曰吾惴惴自今始顧帖帖喜耶居恒嘖咲不侵知大體羣居則以莊憚其黨其黨益親操下嚴不假貸第徧及溫飽無復口體憂要以恭儉慈良四德具矣上林公累世冠閭右其婚媾皆世家居靜納婦程三息女一歸羅中丞胄子一字程司徒孫一字程孝廉子居貞婦爲江方伯女息子三長茂德昏中丞女次

茂實字程登州女次茂勲字程觀察孫女息女一歸
殷司徒孫孫二長某字吳孝廉孫女次某居常納婦
余息子三長茂才字曹參政孫女次茂先次茂弘息
女二一字參政孫一字方太學子太孺人自飾巾距
懸帨踰偕老者一年壽富多男庶幾得全全昌矣墓
在某山之原負某抱某窀穸之事太史公載筆在焉
道昆無敢溢辭直將以是爲實錄

先大父狀

汪道昆曰吾宗出潁川後著新安曾大父有丈夫子
五人次者大父人以大父長者稱次公初曾大父幸

長公守仁公無寵年十四會彊奴有睚眦者曾大父怒而不言公奮白挺大詬曰奴蔑家丈人罪當死奴蒲伏受杖乃白曾大父罷之鄉人壯公聲名自此起矣公亢直不能以一毫挫於人比居庭惡聲不及犬馬曾大父寢疾公宵衣侍臥起旬月始瘳曾大父乃驩謂公能子新安少田賦以賈代耕曾大父務什一力田亾資芥公聚三月糧客燕代遂起鹽筴客東海諸郡中於是諸昆弟子姓十餘曹皆受賈凡出入必公決筴然後行及公既饒或者且加公數倍公意甚得未嘗自功公少文辭然徒以口德取重部使者視

鹽筴必召公畫便宜有司籍名遂以公爲鹽筴祭酒
公雖用芟芟起不操利權凡以刀布授人必置奇羨
由是海壖誦義所部知名時中貴人劉景戌浙江誣
執賈人諸不法事大索錢不者且掠死行縣至括客
皆亡景書公名陰與捕吏約曰此節俠得此勿問其
餘公業已亡得少公守信公頓足曰仲出必死虎口
柰何以我殺仲乃詣捕吏當少公景方掠罪囚目公
甚偉善容而問曰若何爲公曰歛賈豎汪玄儀也聞
貴人下車旦夕且奉千金爲壽景愕然曰吾聞守義
不聞玄儀公曰字也此中善視賈豎故不名景領之

遂目公出舍人附公耳語諸客皆走匿安得千金公持券貸府庫金太守梁公許諾會瑾敗連逮景使者夜至公得完初公被收市人無少長皆泣下及收景爭以牛酒餉公公謝曰干支家言我生之辰適有天赦果然蓋戊子六月六日也公春秋六十從海上謝賓客歸休里中客曰陶朱公有子孫能脩業然後乃爲五湖之游即公二子才年少恐不能無得失公不宜老公留公笑曰乃公斑白道路不爲不勞乃今幸而有棗盛之田祭事畢可具饘粥歲賦秫三百釜可具酒漿治灣池具網罟可佐客羞舍旁樹竹十畝爲

軒二楹可坐客天將佚我以老不佚何爲安能守刀
錐之末爲二子虜也公客海上最久絕足不入倡家
去之日客醉公酒彊授一姬嘗之公命燭作書燭三
跋而書成旦矣既歸不問家人生業客在坐紙筆而
論陳事語纒纒不休時長孫道昆生三年公授古
詩百篇輒成誦客至今誦詩行酒以爲常公語客曰
吾先世殷殷擊鍾而食者千指自高曾下達抱處士
之義終焉百年當有聞必孺子也及長孫對公車公
耄矣公聞除縣吏乃大喜曰人言孺子非吏材吾獨
喜得除吏夫駒服轅下齒壯則良始駕而在鴈行吾

懼其泛駕也公八十餘老日飲斗酒者三有蒼頭一人能秦聲使佐酒戊申八月二日公櫛而升堂命父行觴歌者侍觴畢呼父語曰良彬而翁歸矣顧而弟良植在賈而子在官第善語之母墮先人之緒而翁瞑矣其後十年家大人卜兆唐山伐山得石坎一廣如墉某歲月奉公即窆掩坎封焉而大母吳不得祔

先大母狀

先大母出溪南吳氏高曾以下徙居長林初曾大父爲大父請昏有成言矣里人走告吳公慶曰窶人子稚少文奈何予女子蓋大母祖也於是以他事召大

父公覘之大父著田間冠不事苛禮公喜歸語家人
曰郎君魁然者也必大其門諸母聞公言目攝大母
笑曰即田舍郎大而門而安得持歲鉶鑰與諸母較
輕重也大母既歸事大父唯謹里中率以桓少君多
之曾大父遇諸子婦嚴不假貸大母日夕事甘毳其
能事出諸姒先顧獨恂恂務以身下諸姒大父性懷
急有不合輒不能容大母從臾其間卒無所失居常
默默梱以外不與聞及其決策大事引於正經可片
言定也嘗乘間告大父曰君家世孝弟力田善矣吾
翁買甄括聞諸賈往往致富饒君能從吾翁游請爲

君具資斧大父曰善及大父由甄括起齋用途優大
母拮据室中愈益攻苦里俗以居室重即拓地尺寸
猶以爲難室之南則宗人諸䟽屬產也延袤百步環
而居者十餘家宗人婦時時叩大母貸母錢無不應
者及收責則又卻子錢居數年諸宗人皆德大母會
有故則皆轉徙授大母室居焉當是時大父由甄括
徙錢塘業滋厚矣顧獨不問家人產凡諸田宅悉大
母自梱內置之初年大母不宜子媵黃氏姬會方士
挾驗鬼術游里中謁曾大父曰公家有車馬客先府
君途之里門則吳公慶也客謂府君我之帝所乞丈

夫子當畀吾孫府君謝曰幸哉吾亦得請於宗祏矣
客曰固也必以吾所請者畀吾孫公所請者畀媵女
吾孫先一月舉子使當門府君敬諾客又曰適渡河
眇夫吳帥執輿輿覆兒仆輿下左乳中石傷吾因以
石記之異日洗兒懸疣乃去使知吾效力於冥冥也
甲子正月家大夫生左乳懸疣悉與語合二月黃氏
姬舉叔父其後吳氏業廢大母時時以爲憂里姬私
語曰孺人寧忘諸母疇昔之言何乃自苦大母謝曰
非吾先世寵靈何以至此奈何聞兒女語邪大母壹
以憂勤佐家髮早白既又有肺病未五十而衰比終

天年凡春秋七十有八蓋嘉靖甲辰五月五日也平居善拊循愛人不啻其口出即叔父從家大夫居膝下固不自知其爲孽子云季第子潛善事大母大母以吳氏獨子顧甚愛潛季年則道昆以長孫最幸大母知其有貴徵也日夜望之歿之二年道昆始登仕其後潛振吳氏業復居溪南嗟乎大母皆不逮矣家大夫爲大母卜宅待吉者二十餘年茲得某山之陽將畢大事命道昆次大母行實舉其大較徼惠作者志之銘之道昆唯唯

先伯父汪次公行狀

隆慶己巳夏五月戊午伯父汪次公以天年終次公諱良楷字文正先大叔父子也大叔父爲余大父從弟諱玄侔大叔母蔣孺人以弘治壬戌夏四月戊辰舉伯父往余大父用鹽鹽起蓋與大叔父俱及大叔父季年獨力任門內事嘗爲植治宗室築西南隄吾宗中興多大叔父力大叔父三舉子長公良栢季公良權多蘊藉皆曰能次公推少文不當意輒嫚罵然遇事輕發無他腸嘉靖中三人者從大叔父受賈長公季公居東省若轉轂關中次公主化居獨就常山爲市初次公嫚罵輕發辟易市人既而習次公無他

腸不失爲長者即嘆惜市人愈益附次公次公手出入千萬緡不事簿記或者從次公覆多寡次公徐徐心計應之即不讐次公置勿問市人負同賈羅滋宗鹽直次公出百緡償滋宗出遇僵屍輒爲之棺斂積數歲歛者凡數十人市人語曰誰謂次公椎者媿媿焉急人之困矣伯母許多能事左右次公起家當是時里俗尚鬼爲淫祀伯母獨負俗持儉乃得自置田收田租及大叔父春秋高手割生業三分鼎立令三子覆射之當次公公乃得善地長公嘆曰人亦有言智不如福信矣既而長公季公相繼即世次公不

得志釋業東歸次公少時善飲酒一飲輒盡一石蓋
與客中分之即不勝喀喀嘔數升出已復飲其豪如
此及歸獨坐舍中逡逡耳初次公不宜子伯母請納
媵人既而舉子男三人長道簡從次公受賈次道遠
季道齊皆受易補郡諸生長婦程先卒繼吳中婦羅
有孫一淳一瀆季婦有孫一湘女一人適洪源洪應
暄其婚媾皆閭右次公死之歲冬十二月甲寅三子
奉次公喪藁葬前林從俗以待吉余爲次公近屬故
舉其質行大較毋敢入溢美之言他日即得堂坊請
述余言以從大事

先伯母許氏行狀

伯母出琵琶塘姓許氏父道偉繼室以吳姬弘治乙丑冬十月庚寅生伯母伯母兄有嫂矣兄非吳出嫂不善事吳伯母從室中調和之卒相得正德末訛言中使求女江南民間趣婚伯父乃迎伯母會家大人迎吾母同日歸時伯母與吾母同居相遇驩甚伯母治女紅習書數必吾母與俱伯母事繼姑黃黃遂遂視伯母善人言伯母故能左右嫂宜食報于姑云伯父爲家大人再從兄大叔父中子也諱良楷伯父服賈居浙上游性多疏不事籍記伯母居中主計凡諸出

入若家人產一切籍記之即伯父伉直難下人顧獨
以身下伯母蚤歲不宜子尋進伯父媵人媵人兢兢
事伯母唯謹伯母攝中外率務操切顧獨寬媵人居
無何伯母舉三男子一女子中歲家益起伯母所就
業爲多里俗方溺巫覡事禱祠伯母獨縮羨餘置田
宅里中甃路若干丈棺斂若干人大叔父以下率以
爲能中外事唯伯母所可否居常負意氣然諾不侵
即不當伯母心雖百口不能奪也顯者子請婚伯母
女伯母固辭中人之家終不慕顯者子女卒謝顯者
子歸洪應暄及伯父季年二子皆受博士易業浸削

齊用不饒伯母負意氣自如無所詘隆慶己巳夏伯父以疾終越冬十二月癸亥伯母尋歿春秋六十五耳病革顧命二三子曰中丞伯子以著述聞其母又吾所善叔姒也宜狀我三子唯唯既卒哭則以其治命命之余何敢辭因述其取取者爲狀乃若子姓婚媾具在伯父狀中

從叔母吳孺人狀

叔母吾宗宗婦也初溪南吳處士福增從西山宗人受室宗人善大伯父且議叔父婚宗人曰吳郎二女皆良第卜吉者爲公子婦大伯父則以中年獨子將

欲約長者婚乃之卜人少者兆宗人笑曰人恒言少者福厚果然即叔母也處士方買淮海聞業已盟心望曰汪即故家其聚會不能以十室柰何予女既自知其得壻乃驪叔母少叔父者二年年十五歸叔父會大伯父賈甌括駸駸起家大伯母顧獨攻苦茹辛衣布衣飯脫粟叔母雅不習菲惡至則怡怡然習之於是得當大伯母心以爲能婦大伯母居常蹇蹇無他能第持局鑰察雞豚灌園樹蔬治酒漿脯醢叔母從事唯謹不憚用勞及叔父由甌括徙錢塘登上賈矣叔母舉二子二女率身乳之人或不堪其勞叔母

謝曰子生三年而後免於懷非是則安用母居庭中
無評語出入無惡聲聞諸妯小有言輒辟易置勿問
惡聲自外至率閉戶謝之叔父操下嚴不假貸即羣
小得罪叔母匿不以聞甚者叱咤相加唯唯而已遇
諸子女有小過不譙責獨垂涕洟諸子女聞之慙自
傷亾不悛者其後長子受賈轉入淮海家愈益饒大
伯母春秋高授叔母家秉叔母務纖儉終身未嘗爲
富貴客家食數十人自比其最下者侍兒以衣垢請
澣叔母叱曰衣亟澣則亟侵敝無日矣第滌襟袖吾
復著之此長久之術也遣嫁二女不異中人家無

何長女歿季女適郡學生胡文宗文宗亦歿叔母嘆
曰長女死無子吾無如之何季不幸寡貌諸孤在焉
此吾事也乃中里而授季女室日訓之以織儉立諸
孤而長之季年長子道暎以貲爲郎授京衛經歷仲
子道晔受博士易補太學生叔母在堂則長婦吳仲
婦程咸在吳舉子六有婦者二人當是時門內林林
盛矣叔母有肺病猶終日胼胝祁寒暑雨不少休既
又病脾以隆慶元年五月九日卒距生正德元年十
月十七日享年六十二云叔父謂余曰徃予與爾叔
母治家事事畢舉子未老而白首具曰予勞乃今舉

者什三廢者什七何以故內無助故也予親持局鑰不旋踵而多失亾予察雞豚貿貿焉日損矣園蔬不治酒漿脯醢不供乃今知昔之什全爾叔母力也傷哉余惟婦女無能能者害也余觀叔母孳孳鹽米之細務不可謂能概於中庸則婦順章矣余幸得與喪事遂次其質行爲狀俟封樹而銘之

羅氏姊狀

自吾姊喪羅氏垂二十五年羅伯子守明經未能墓吾懼其質行將湮沒爲之狀以竢之初大父母亟議吾父母婚蓋日望有孫也婚五年而生女又三年生

男於是大父母父母乃驩愛之等姊之生也淑而莊
因以名姊家大夫最愛姊往往負之背必曰佳兒佳
兒兩人始能言大父母父母輒教之讓食至必舉箸
分啖之母敢專噐或餽餅餌剖而授之半母敢取完
即懷甘毳自外來兩人交相讓也母敢自食舉宗長
老皆喜謂他兄弟莫如兩人親雖大父母父母亦心
予之驩甚矣吳氏姊在室出入必姊與俱家大夫多
二女能並令就學大母則以非女事也罷之姊未嘗
受書獨循循中禮非梱內不以步非內言不言當是
時業已受采羅氏大父母父母數目姊笑曰嗟而男

也豈不丈夫子哉乃今爲羅氏畜也歲庚子姊始笄
既歸羅執禮馴謹羅伯子謂姊能婦其大母父母皆
驩羅故饒壹以儉德爲訓立論菲薄一切甘焉伯子
受春秋父程督之急即入子舍必中夜讀書姊以爲
勞具饘粥餉伯子父詎曰誰謂新婦能者夜炊何爲
既而察其亡他愈益重姊辛丑姊聞吳氏姊死心自
傷語伯子曰吾與從姊出入率類其爲人從姊亡吾
將不免壬寅姊病亟召醫醫無能爲遂以死二月十
九日也距生癸未十月六日僅二十年促矣姊死之
明年母乳吾弟蓋同胞者三人後五年而吾入官又

十五年而爵及吾父母其年吾弟入郡學則與羅伯
子同舍云伯子數奇又內難遁作姊死徐繼之徐又
死洪繼之姊遺一女始孩尋又死其後伯子有五男
子其二孽子也則姊故媵人舉之汪道昆曰余載姊
狀詳于吾家蓋其女德取取足稱家羅氏僅旬月耳
余得謝而姊之喪未舉則余之罪也夫何以狀何以
狀

太函集卷之四十三

終

太函集卷之四十四

新都汪道昆伯玉著

行狀四首

先淑人狀

萬曆六年秋八月乙巳母淑人以天年終越三日戊申始成服帷以內不孝道昆帥介子道貫冢婦蔣帥介婦蔣各就左右次諸孫諸婦各次之諸子諸婦次之功總又次之門內袒免若門外宗老負東牆諸妾婦負西牆家大人位靈几東南鄉坐叔父位家大人左西鄉帷以外親黨北鄉西上叔舅首焉次者吳氏

叔次吳氏兄又其次則羅兩甥也男女僕各百餘曹蒲伏堂下各就次交相吊各盡哀家大人杖泣而語道昆孺子母噉噉爲也淑人業已在殯論定恒于斯異日者將請于朝待命而終大事其必謁諸名世作者爲傳爲碑爲志若銘庶幾有當於一言毋且不朽第陳其槩而後可以藉手孺子圖之不孝仰天擗地而號兒未獲死所耳淑人故病肺每秋至病甚輒眯而譖及不孝得請歸養三年淑人幸無恙是春始手戰唇矐不孝以爲憂人謂里中長老往往有之天年未艾也夏四月不孝昆弟皆病脾于時臥病郊關

凡五閱月日遣豎子問淑人安否必曰安問淑人起居曰彊飯曰神益王曰顏色益腴曰鋪曾孫曰佐至人翁課租入比涼風至昆弟請期而歸家大人戒勿來埃病良已時不孝猶咯血且瘍于要卒歸如期則淑人寢疾三日矣豎子夙受淑人戒匿不聞至則淑人猶彊起盥櫛坐房中不孝既覲淑人胡爲乎母有病色且深也淑人自言食味中肺乘秋則不勝以爲常既而淑人察不孝瘠甚骨崖然若翁涕泣而私語家大人曰大兒何驟至此質明病益即良醫禁方遞至遞進卒無功天平夫乎病何由深則不孝深之耳不

孝之罪滋大獨大人在不能從母黃泉將哭踊之不
遑又惡能爲是纒纒狀也叔舅起曰淑人姊在室宇
知之天不造胡伯父珙蚤歿伯母汪年二十七而寡
惟是淑人姊始孩伯母穉淑人姊而矢之是呱呱者
即女雛他日可當吾室既得封司馬輒許之盟淑人
姊方待年志行恂恂如長者年十六既醮而歸寧諸
姊妹皆自閭右歸競膏沐淑人姊持裝如故終不爲
冶容伯母以完節終淑人姊立吾弟宥以後伯父躬
視襄事且爲伯母喪三年人曰母故以當室期之亡
于禮而禮也兩家相距僅五百步淑人姊後伯母死

幾五十年即以富貴終身未嘗再至吾里往伯父祔
大父而葬伯母異丘司馬甥既白所部表伯母間請
遷合葬淑人姊不可若母以吾父母而干吾大父母
懼將爲胡氏子孫憂乃令省封樹歲時爲伯父母奉
盞嘗五十年如一日也家大人曰信吳氏叔起曰淑
人嫂善爲潛淑人姑婦潛知之贈司馬公有丈夫子
二人而封司馬嫡也淑人姑視淑人嫂如視封司馬
而淑人嫂婉婉母事淑人姑有加贈司馬公居家不
假貧蚤起淑人嫂率仲嫂肅拜而朝即迫期不及掃
髻淑人姑心竊喜吾始以爲孤女驕矣顧獨能任新

婦勞淑人姑季年肺病甚淑人嫂佐封司馬侍臥起
蓋餘十年不少衰乃今就輿昨歲時爲淑人姑奉盃
嘗三十年如一日也家大人曰信吳氏兄起曰橋有
姑爲淑人叔姒蓋與淑人同歸姑庶而介其始不能
下淑人而淑人由由然以身下姑語無間其後十年
姑亾而杜繼也視杜如姑其後三十年杜亾而莊繼
也視莊如杜視姒之子女若庶子壹如其子諸子女
壹切以母視淑人蓋迄今如一日也家大人東顧叔
父曰信帷之右諸母起曰固也往吾曹同黨者二十
有一人則皆門內親也淑人之視諸伯叔姒猶兄弟

也視諸伯叔姒之子婦猶子婦也邇者淑人春秋高
不問錢穀諸子婦即告緩急甚則徹月奉貸之脫不
充往往出橐中裝資質劑其償其否即子舍不及聞
吾黨雅言淑人之組紉絲枲夫人能也祭祀燕饗夫
人能也即讀書好禮夫人能也至其慈惠長厚一稟
於肫肫蓋梱內無兩矣乃今二十一人者寥寥漸滅
不者惟是二三殘人而淑人歸然獨存爲吾黨祭酒
顧今已矣謂吾黨何家大人首應之諸子期功以下
籍諸生者立帷東宣言曰里中文武起家則伯氏嚆
矢始在外傳伯父方事周游惟茲歲幣月脩咸淑人

之自出及伯父溺方士不問家伯氏始入官非稱貸
不給其操志故絜終不以不給而弛斤斤伯母饗之
即粟帛猶膏粱文繡也久之歲入稍益時而羨餘伯
母居其贏不自有也聞人之訕不啻傾橐辨給之比
于終身竟垂橐耳年四十乳仲氏愛尤甚焉至其食
之教之視伯氏等仲明敏不減伯氏顧孱弱不任勞
伯父程督之嚴何出而兄左也淑人謂而家先世之
澤洩于而兄而小子即彊健不廢采薪藉第令舉子
男不廢支祀而小子足矣惡用爲是搢搢殫餘力以
希儻來及伯氏以左司馬上程書則移任子授仲淑

人聞之而後喜可知矣人言伯仲競爽淑人樹之有
開必先皆是物也家大人曰信諸婦立帷右泣相語
曰伯不幸而三納婦淑人三宜之始納淑人吳七月
而以瘵歿繼吳不勝中饋淑人久而安吳及吳生女
踰月喪京師淑人躬自女之也且曰息婦歸吾子十
年惟此耳無寧以此而傷後母心及淑人蔣來歸憐
女甚而淑人終不以女畀蔣卒主鮑氏盟而字之鮑
大父司徒公故廉無厚產壻世延亾其母淑人大以
爲虞及女既昏猶相依旁舍時有不足咸仰給淑人
及介婦來淑人視冢介猶伯仲也晚年益善視冢婦

恒以疾苦相勞懼其不永年疾幾終必族冢婦至乃
暝至爲諸孫納婦拊之如孫仲孫病迷而仲孫婦獨
持戶歲有常糈淑人閔焉代其憂即薪水米鹽莫不
時其乏絕嗟乎里中所不足者非財用也顧安得如
淑人慈家大人首應之如嚮者越姬何爲家大人妾
事淑人四十年則扶疾出中門匍匐几下痛哭曰妾
少無狀無能奉淑人驪里俗操妾婦若束薪什九不
免淑人幸寬妾往往棄舊過而與更新及伯仲皆受
室乃始異宮而淑人愈益親妾辛酉疾幾殆甲子亦
如之淑人納伯子言則以家秉授妾比來妾嬰末疾

人或以斯疾而有後言淑人依依然與妾俱不爲動
往者疽發背妾且殊淑人色憂泣爲之下人以是益
多淑人長者即以手足視妾無他腸吁嗟嗟乎哀哉
淑人往矣妾第從之俱往無憾也家大人曰信諸男
女僕叩首曰淑人蒿目而憂人之憂豈惟是宗族隣
里鄉黨諸男女僕有疾苦必以告有患難必以告貧
乏必以告輕者庾出餘粟篋出餘布甚則徹月奉貸
之即不能償置勿問蓋數十年如一日也家大人曰
嗟乎淑人之自女而婦而奴而母而姑而王母而主
母帷內外徵之即疏屬無間於所親其言具在是可

藉手以胥信史孺子志之不孝唯唯

先府君狀

孤自尚書郎請告以來骨肉幸無大故哭泣不及帷
簿總功不及櫛梳歷二十有五年衍衍然二親寧百
順遂矣戊寅八月始喪我先淑人于時先府君屬孤
狀之得請 卹如令典都人士以爲希覲榮且殺哀
先府君直以老而不偕哀未殺也踰年而喪曾孫當
戶踰月而介婦蔣暴亡八月諸子道耆未室而殤烈
女方歿其難十月喪我叔父十府君先是災在剝膚
迄今則手足戚也十二月喪我從叔父十一府君三

府君竝以甲子生鼎足夔矣又明年六月喪我吳氏
叔先府君故急叔晚最驩故其喪從弟猶之弟也喪
內弟亦猶之弟也八月喪寵人何先府君故彊季年
可當盛壯寵人去側於是乎始鰥蓋逋死逋哀哀而
傷矣九月當戶同母弟又殤皆嫡孫無彊婦羅出也
是月次孤道貫始舉庶子無央先府君賴少安神駸
駸其將王歲杪則無彊蒙內難羅伏其辜先府君咄
咄而恚自傷持無彊日夜泣先是孤逋病先府君逋
憂之次孤逋病則憂冢婦蔣病則憂長孫無擇病則
憂憂未歇也歲首無彊病幾殆大以爲憂因而不寐

者累旬神益憤憤七月丁丑末疾大作至八月庚子而殊吾宗長老率諸親戚閭里徧走羣望禱者千人羅拜藜祠下皆曰長庚翁長者人願各損三日以益翁壽可增十年無已人各損一日以益翁壽可增三年凡二挾旬其日庚戌竟以子之半即世嗚呼哀哉既帷堂中外視嚮者少損上之失第一從第一內弟一下之失妾婦一子婦一諸子一諸子婦一孫婦一曾孫二蓋先先府君而無祿者十人臨者相嚮而哭失聲即倍嚮者不啻也相者謂先淑人之喪則以先府君之在堂也孤狀矣廼今國有成事將胥後命

以圖厥終願輟哀狀之無將曰先母而後父孤稽顙
受命就筵几而痛哭曰先府君有生則王父母竝受
譽命孤既爲王父母狀作者李于鱗志之其言在也
其有儷也則先淑人生有封而死有卹孤既爲狀作
者王元美爲之志許維禎爲之碑其言在也先府君
始及艾就養京師其時同朝同籍同鄉諸君子稱壽
者無慮數千百言而方中永定之爲倡其言在也其
及耆也孤受疆事則述先府君之槩而乞言於海內
諸交游其時稱壽者無慮數千百言而吳昭陽明卿
爲倡其言在也及孤入佐邦政先府君居老於家孤

奉使行邊無能爲壽其時中外稱壽者無慮數百千萬言而元老江陵公首惇史而先鳴王廷尉許宗伯竝起其言在也乃今將及耄也不孝兄弟聚首而謀禮稱耄耄期頤則齒以什迭進世之爲壽者壹以此爲程期非古也且也人子喜不勝懼直將以日爲年假以松柏岡陵即比日而壽可也比年而壽可也日何必初度歲何必取盈家大人以甲子生歲更始而玄枵在次藉令以癸亥爲紀獻歲端月當告存不孝將庚乞言爲大耄壽願如陳事述家大人之晚節爲先談仲詰伯兄先譚者何也不孝則以家大人爲高

門之自出其未姪也巫方業已預言之矣徵于吳大
母舉家大人於中年擁護百至家大人生而魁岸薄
爲儒長從王父東游復薄爲賈日習技擊騎射將以
良家子待起鷹揚王母亟召歸而母終不以掌中隋
侯博肘後上將軍印會王母疾歸問禁方適方士言
神仙則事神仙者餘十年所既欲徼福後世孳孳治
形家言不孝始學幼儀輒程督不孝學禮自言生平
務吊詭者三事其一慕不死之藥逝將乘白雲而游
帝鄉其二挾圭測以中堪輿希儻來者以爲必得其
三則吾汪系出越國徙千秋里者四百餘年累世著

田間冠獨以側注冠吾胄子即無似彊授一經以充
吾宗三而一詘焉神仙是已茲兩者吾日幾幾望之
也庶不負吾家大人少挾倣儻而命賢豪既貴乃折
節爲讓少工技擊遇私鬪輒卻步不前少工短長遇
惡聲輒拚耳走少從吳處士洋習醫處士國醫也家
大人得其一體起死者數十餘曹閭里無老少䟽戚
率倚家大人爲命處士歿則以故業授處士之子橋
若內弟潛兩人者大行郡中多所全活家大人猶諄
諄申戒之也藥無當于司命生死以之善則膏粱不
則鳩毒惟所用之耳老夫耄矣與其鬻技而賈遺憾

無寧藉手兩生由是不復言醫而問藥者猶接踵至
少習騎射喜談兵嘗受陰符陣法遁甲風角諸書其
術多秘不孝在事則驛而授之行間及聞戚都護平
東南以節制勝翻然改曰此堂堂正正之所爲務也
惡用竒由是肱篋而焚諸書不復言兵事不孝少耽
鉛槧家大人日討而訓之大匠任繩墨其次斧斤其
族剗劖孺子一何細也舍清廟而務雕蟲及聞江陵
公與不孝言司馬以多文著矣願進于是其以經綸
爲黼黻文不既多乎家大人三歎而旨其言經世者
所爲國華在是已道貫好古而癖重購二代遺器若

諸家法書家大人亟屏之胡爲乎以耳視爲口實即
稷書孰若鳥跡郃鼎孰若汙尊貴異物而賤用物非
先王法家大人受王父居室務完繕增固無建置無
更新諸器用務傳子孫無雕鏤刻畫居常攝敝衣曳
敝蹤無所芬華不孝遞以文繡薦之或貨而益封樹
拓田廬或篚而幣賓客弗御也旣而以襲衣進固請
御之家大人艷然曰而翁得道于老氏故能敝不新
成生平薄萬石君毋庸湔浣勤子舍矧鮮永也王父
故豪于酒家大人亦以酒豪比中年乃絕旨酒日盡
斗者什七八視昔酒而薄有加及不孝歸侍夕殮必

盡三升而更進一卽度閤或失鉞刀匕或矢和未始
不饜家大人富精神中夜輒起治書記徃歲先淑人
坐便坐家大人自西園歸先淑人諷曰翁春秋高所
不足者非蔬食菜羹也何哉寧必戴午日行夏畦而
後能望翁腹邪翁休矣家大人敬諾由是不問家獨
陰樹德以芘後人垂老不勸春社必市生螺若干石
放深渚中凡畜鳥昆蟲得之耕弋網罟者不之市而
之家大人所卽不給必得當而活之南隣殺牛去吾
舍三里而近牛脫縛奔吾舍屈前兩膝膝家大人前
家大人市而飯之藜林踰五年歿瘞其齒里人歎曰

長庚翁陰德故饒異類格矣斯其晚節之較著者也
政府之尊踰等何敢更徼一辭宗伯爲肺腑親庶無
難色往年廷尉得師入道則自掩關遺不孝書自今
業已墮管城族毛穎獨留一雋待命公家以此而抵
二名家宜如嚮者仲曰未也古者內稱不避如之何
遺高義而更僕瑣瑣爲王父贈司馬公操下嗃嗃家
大人有子長矣有過輒杖之庭家大人山立而矢行
蒲伏受杖無作意王母淑人病肺久率倚辦湯藥而
終天年里俗庶瘠而嫡肥有分割則嫡爲政家大人
兄也嫡也顧由由自下終世無違言始將以說輟敗

輿則內嬖用事輓近歲善相目卒不失先淑人驩家
大人受祿養者三十五年僭爵者居半嘉靖辛酉伯
氏最襄陽 誥封父良彬中憲大夫襄陽府知府隆
慶辛未伯氏由四岳上程書 誥封父中憲大夫都
察院右僉都御史著爲令明年 上即位覃恩 誥
封父通議大夫兵部右侍郎貴重矣何論郡中莖莖
即寓內可多得哉顧出入與衆庶同惡衣食與厮養
同卒然遇之不測其爲家大人也孝友恭儉惇厚人
倫此其鉅者也嗟乎不孝之所陳則近事也言近故
其說長仲氏之所舉則平生也舉其平生則作者習

聞之矣于時將分道紹介東入吳北入燕而未發也
嗚呼哀哉先府君已矣自大火而次孟陬不及五舍
薄其藩而蹙之步其天邪人邪嗚呼哀哉先淑人之
棄栢椿昭穆房皇具在即天年少縮而家步故舒先
府君後先淑人者三年恫瘝憂戚備嘗之矣蓋獨當
其阨何有于三年生我劬勞斯其罔極孤直將銜之
五內顙之九天爲拊膺爲泣血爲擗踊爲號咷又安
能爲狀也相者聞孤哭聲則述之以告有位皆曰二
孤縱縱當事殆難爲辭徵諸疇昔之言即無狀而有
狀矣相者又曰日者東首始遷庭內聚哭始復門內

親哭始含舉宗畢至而哭始歛外姻至而哭始殯通
家至而哭在堂則尊而有土者有爵者有齒德者親
而有知交者即位而哭卑而受廬者受田者受脩者
受賑者負者販者游食者緇者黃者誦義者嚮利者
欲報之恩而無繇者即序而哭遠而素車至者望鄉
而哭近則行道之人望門而哭其言纚纚而盡其聲
噉噉而悲祝史識之凡是皆狀也要以雜而不越無
間于二孤之言狀具矣凡諸子姓婚媾備先淑人狀
中道貫繼室以方府君命也無擇始舉子當時易名
祖咸次舉祖豐法得併入

先叔考羅山府君狀

歲已卯冬十月不孝方奉 國禮塋先淑人朔日雞
三號叔考終於正寢越三日成服則不孝昆弟襲斬
而衰乃從諸孤朝夕臨朝夕奠如喪先淑人禮踰月
將從大事則又相嚮而述叔平生之言不孝布狀以
從銘旌且告吊者始王父母祀高祺無驗內黃氏姬
甲子正月舉家大人二月幾望舉叔蓋差嫡庶爲先
後語具王母狀中於是舉同匡食同乳負同襁出入
同襟裾游同方受業同席王父命叔曰良植旣冠而
字文林則之武林並從王父賈鹽筴王父嗃嗃即跬

步母敢踰王父釋業歸叔翩翩豪舉矣始則以聲伎
蹴踘爲俠少游遂傾諸俠少既則脩爵無筭爲酒人
游遂傾諸酒人久則諸貴仕樂從叔游輒以貴游而
傾東省其後鹽筴使者立爲賈人正則折節而操正
論游大人而爲名高年及彊猶然以酒困游既倦負
疾西歸與人不取苟容然獨以然諾取重于是以賢
豪長者游鄉人間鄉人就而質成即片言解矣初室
叔母吳亡息子二息女一吳亦偕亡叔母杜繼之亡
息子二息女一尋舉二女一字吳一字洪叔御陸氏
姬首舉道坦頃之杜舉道會杜病阨危叔聞之歎曰

乃公不能爲方外游又安能棄妻子如敝蹤輒歸視疾不復之四方頃之陸舉道貞杜竟不起叔母莊之繼也叔耆而舉道耆伯仲皆婚於羅長者有孫無息無逸羅早世繼以吳次者有孫無咎無虞無極無過叔婦黃氏未有孫季聘烈女方是爲南寧太守瑜女當叔之舍賈也則課豎子服下賈以爲家豎子亡悉亡資斧旣而屬洪氏壻復厚亡旣而屬諸里人亡且盡叔翻然改曰吾耽末富而日損無寧力本以終天年於是拓畝鍾之田凡七十畝力耕者什之一其餘則授田夫鄉人往往以居息起家且爲叔部署于是

亦從居息一在下里一在中都歲出入無羨餘顧孳
孳喜客客至上者帳具次者授餐即日常見之不廢
飲食叔故病疝春秋高病益深即膚革日侵其神猶
王今歲當阨所不能釋憾者三往不孝藉叔寵靈蚤
歲而駕及其督道坦學無成功迄夫道會受書程督
一如不孝顧逋舉不偶則傾橐而入成均夙夜皇皇
幸一捷以塞其望憾弗逮矣烈女待年五稔道者鮮
而烈女殉之則命仲子無極後道者噍噍有遺憾矣
吳氏女若壻先叔死洪氏女少而發藐焉一孤始室
而歿無慮洪不血食其將如二寡何即不孝日進寬

言領之而已且謂脩短命也吾年七十有六不爲不脩吾將大歸待期而盡可也病革語不孝曰吾門賴汝而大乃今里俗日非顧諸父既及崦嵫舉宗于爾乎屬目其及時有樹貽父黨令名勉矣不孝唯唯叔將命不孝何樹邪叔慨然曰出則有裨於國家入則有造於宗族皆樹也諸孤屏息長跼受遺言叔若罔聞終不及家人產叔母以爲請目攝之不孝進曰昆在毋煩馮几之謀叔首應者再遂瞑叔與吾父母同齒終始無相猶疇昔喪先淑人茲且喪叔獨家大人在歸然而再臨喪不肖昆弟若諸孤所不深墨者非

人面也吁嗟嗟乎傷哉叔父已矣上之得吾王父母
以孝著慈次之得吾父母以弟著友內得諸母以和
著順俯得吾儕兄弟以愛著恭近之得諸廝豎以惠
著忠遠之得宗族鄉隣以忠信著敦睦藉令以儒術
起庶幾三物可興以彼其材即效一官舉一職易與
耳往島夷發難督府直將以參佐辟之叔笑曰吾何
用章服爲哉卒不應故迄今猶稱處士云

仲弟仲淹狀

先府君遺體惟孤伯仲二人仲則仲淹名道貫孤年
十九仲始生即少長相懸才伯仲也業伯仲也狂簡

伯仲也高明伯仲也孤起三禮則授仲尚書孤四十進列卿仲始結髮傾章甫孤治風雅攻典墳仲亦脩古孤黜多岐究三極仲亦研精要以潛心深造仲不及孤神解玄通孤不必賢于仲仲就外傳從弟道會肩隨之會字仲嘉命曰二仲即陸沉丘里雅從孤游時而父暉時而盟主時而夾輔時而良朋仲居季孟間鼎足時矣仲故善病病得之未孩始乳而驕非先淑人不飲先淑人踰彊浸弱不任劬勞先府君屬嬖姬祿之以飽代乳姬務姑息脾浸損而疴幼從京師病疹幾殆兩遇國醫而起荏不勝衣先府君命蚤婚

年十六逆共蔣督學吳公路奇仲補郡諸生有司以孤母弟聞呼爲小司馬孤募兵故邑仲省行間孤拊其背曰嘻若安能業佔畢爲儒庶無疾病足矣閩帥戚元敬語仲公何用儒第挂一名良家子籍中繼光願以十萬戶爲公食邑仲否否吾寧以揖客博大將軍歸試有司褒然舉首仲以吾家自王父而下世以酒名吾何負公孫朝即不任而彊酒頃游閩海泛浙江由吳會入金陵酒過滋甚孤貳邦政仲如京師于時客屨闕門多任放仲就外館爲長夜飲孤不及知既得請寧親仲病矣良醫吳伯高百劑無驗仲請易

醫加劑五十有奇病乃愈頃之遞喪考妣則從孤居
廬並毀瘠將不勝仲視孤少王既終大事仲復常會
李本寧朱貞吉客新都遇仲莫逆相與東下乎吳區
同登縹緲峯踟躕四顧雲氣吞吐風雨晦冥變幻盤
旋如燭龍如結蜃雨甚則張大蓋箕踞縱觀一跼注
載酒五斗從之路絕不得火瓢飲立盡踉蹌而入虛
舟夜遞起遞洩雨淫淫及脛既別二豪歸子舍足蹠
踣不前既而廢既而篤肌膚悉亾顧其目熒然其腹
杲然猶喜繙書且善飯久則枵中不受補醫告技單
是春瘖無聲及秋則右手指並廢孤固知其不臘猶

日幾幾幸無虞冬十月仲嘉將之大梁胥命太函爲
別近屬饋食偶甘之中鬲闕而不輸遂絕粒適縣大
夫人境仲戒家監勿以聞甲寅而殊夜告急乙卯雞
三號而往明發登其牀仲聰明猶故吾神色喪矣孤
飲泣語曰身後惟而兄在即不逮無競其庶幾乎仲
頷之仲胤子無央侍側孤拊之媿媿相視霑襟仲數
目孤由由自若亟呼藥孤探囊出一丸飲之仲耳語
仲嘉藥無闕而力不神無幸矣乃命刀筆書遺言示
無央戒之戒之第服伯父若從兄之訓聞繼室涕泣
戒曰母然日方中仲顧命侍兒且就枕仰而上視亾

其精扶而起瞑矣無央爲喪主奉嫡母若諸母皆斬
衰嫡擗地呼天無央爲孺子號咷孤帥二子無擇無
競皆期服哀如三年喪仲嘉從兄道坦帥弟道貞皆
大功哀如期服含而聚哭歛而聚哭掩棺而聚哭皆
失聲既帷堂門以內乃大臨自衰麻以及袒免莫不
盡哀婚姻賓客交游率以遠近先後至或下車哭或
望門哭或升堂聚哭百里之內莫不信宿來奔治命
三年而後發喪四方畢至其生未艾其死則哀嗚呼
已矣人言伯仲于喁倡和有如填簞一步一趨瞠乎
其後藉第令得志殆難爲兄二監子終身阨之命也

仲稱詩學校學曹學杜屬辭學太史遷六書學李丞相王右軍其清狂學嵇阮恬惓學孫登陶元亮勁直學陳太丘王彥方居常昂昂高步不待聲控而良遇合則下褐夫不合則唾軒冕故士多豫附推輓之翼飛之以恩義交者經術則王元馭文學則李于鱗并州直以通家也者而弟之乃其心則師元美以道義交者爲王敬美李本寧沈君典焦弱侯馮開之沈純父戚元敬以文藝交者爲黎惟敬歐楨伯屠長卿余君房徐茂吳方子及王季孺沈箕仲丘謙之邢子愿李惟寅陸無從莫廷韓胡元瑞吳翁秭梅禹金梅季

豹俞仲蔚俞羨長李季常王承父周叔宗王百穀張
伯起楊伯翼汪長文余宗漢方景武張孟奇以意氣
交者爲汪于周黃全之曹子念方翁恬尹教甫陸伯
生孫齊之張幼于以忘年交者爲王子中陳達甫王
仲房江民瑩許元復周公瑕沈嘉則黃淳父郭次甫
以忘勢交者則許維禎譚其理王相如孫文中劉學
禮以里社交者則江民璞方定之程德良程汝懋吳
伯恒張南榮余伯祥羅德鳴方思善詹東圖范原易
曹仲宣布衣則吳虎臣方獻成陳仲魚蘇君楫程子
虛方君在方羽仲潘景升謝少連劉子矜吳茂名方

嗣宗許伯上方伯雨黃孟晉潘懋德邵長孺余無且
金子實以方外交者則山人涂純一比丘可然真可
殊宏德清真節貞珂貞愛正誨洪恩寬悅即仲不爲
名高游道半懸寓矣先是 上即位覃恩孤得任子
請移子任任母弟從之時太原相公爲大司成一見
而奇仲得燕兒程經藝多異聞譚襄敏特書兄弟同
鳴四言授仲歸揭輿室何中允典南都試明年過仲
都市中仲往拜之引之上坐仲辭避自言甚慙于仲
淹目精偶亾欲側公席而不可得敢謝不敏鄉大夫
十餘曹周旋爲會會必召仲仲不至不觴仲即席笑

曰列卿其惟月乎余小子則其閏也及歸闢白榆社
孤爲長龍君御爲宰丁元父呂玉繩佐之仲爲監客
自四方來與國則同盟異域則否即痿痺猶與疾相
從丘謙之客太函將過仲千秋里孤發急足語仲詰
朝第就初筵有如里中具客羞則已費仲答曰故人
輕千里過環堵即典敝衣貰旨酒吾願爲之勿以乏
故而距上客延攬結納則其性然至其睚眦富家翁
視金窟猶糞壤也嘗從孤飲潘汀州所一夫煮海爲
富哆口自張仲面叱曰吾黨之言如蘭焉用銅臭公
饒塩筴弟歸而籌之家吾兄弟不樂聞母溷吾耳乃

若躬行有得出入不倍于人倫庶幾君子先府君以
寵人保仲及長仲多自功因而生心將構內難孤私
語仲吾與若皆嫡厚若不啻厚吾昔奚齊不利于申
生則驪姬出吾與若非其倫也仲唯唯由是間者百
出卒不行遂篋私蓄陰授牖下私人仲無所預及其
以惡疾死伯仲以禮葬之羅氏姊蚤亡媵女有子亡
賴數詒卮匱衣襮質子錢家跡而三予之期不報既
復來謁仲必授之精而後行繼室方出結林故儒家
女大父治博士業與孤同游父匿博徒冠履不具予
之錢穀悉付酒家出境而中道亡幼子女皆人役仲

贖其子飯僧舍贖其女字吾宗孤言急周親振乏絕
吾則優爲至若施者倦而求無厭孤將舍是仲則賢
矣之人也文則脩文行則脩行華實並茂於是乎周
顧以介弟而貧以任子而阨以中壽而殂疾疾憂患
無不周大焉吾于天道有遺憾矣自主婚媾三息女
皆有家三甥則徐守位潘之忱方斗符皆閭右無央
聘商山吳太學女則孤及諸吳盟孤故溺堪輿兆多
吉卒哭後將爲無央主卜擇可而葬之若志若銘若
表若傳則諸作者在

太函集卷之四十四

終